

道光庚寅重修

南宮縣志

第二冊

本衙藏板

河北省南宮市文化遺產
南宮市國家檔案館翻印



南宮縣志卷二

建置志

自古量地制邑度地居民蓋綦重矣南宮自遷鳳岡
屢經增築城池深固街衢整齊列市布塵通闕帶闐
較之他邑稱爲壯觀至若公署以出政壇廟以禮神
倉儲以備緩急卹政以收窮貧樹風聲則有坊額通
郵傳則有鋪舍精藍古寺亦附於壇廟後焉志建置
城池

舊城在今治西三里明正統十四年建成化十四年衡漳
汎濫官民解舍盡沒知府余瓚知縣李麟議遷今地舊稱

飛鳳岡築土城周圍八里高二丈廣三尺城外爲隍隍外爲隄隄外爲重隄草創之初規制簡畧正德七年流寇猖獗知縣孫承祖修築繚以甕城崇爲敵臺嘉靖十八年因值京師戒嚴知縣王用賢輒罄俾堞由是漸加壯麗三十六年秋大雨浹旬重門傾敗知縣葉恆嵩又增拓之隆慶三年知縣胡嘉謨以城垣卑薄不堪保障議申增加高厚以遷任去不果四年知縣周良臣仍前議增高城垣竝女牆高三丈七尺以四門直衝街衢形勢未善因改曲甕門四座砌以甗券封以鐵葉極其堅固增置垛口壹千玖百拾玖箇敵臺拾陸座腰鋪拾陸座六年知縣喬巖登城謂

城既高峻莫爲之隄何以持久築護城隄周圍十里隄高三丈基廣二丈五尺上廣一丈濬池深三尺面廣三丈

本朝康熙十一年知縣胡景銓見陴垣坍卸水路傾圯乃具詳捐俸募民修築垛口加以橫木木上疊輒三四層城益聳峻

按舊志所記如此迄今百五十六年城樓腰鋪敵臺垛口全行坍塌四圍可通往來處甚多所當亟議修築者也

公署

縣署在西大街大堂三楹堂之前爲月臺爲甬道又前爲

戒石亭爲儀門東西爲角門又前爲大門上有譙樓又前爲照壁壁內石獅二大堂兩翼東爲快班房架閣庫旁爲吏戶禮倉房戶糧房西爲壯班房旁爲招房承發房兵刑工房月臺兩旁爲皂班房儀門兩翼爲收糧房大堂後二堂三楹東爲錢糧庫東房西爲儀仗庫二堂後三堂三楹再後爲知縣宅

舊志公署成化十六年建廳事三楹兩翼六曹廊房之後爲恪共堂彈琴室在恪共堂東萬歷四年知縣邢侗建知縣宅有堂三楹室三楹東有書房三楹土神廟一楹康熙十年知縣胡景銓於宅後建樓三楹東西建從

房各六楹從房之左右更樓二座書房後建集思堂三

楹左右廊各二楹其木瓦甎灰俱係捐俸置買不擾民

間

按自志後屢有更易堂室多不可考惟樓尚存

縣丞署在縣署東

典史署在縣丞署南

城守外委署

向在西郭外龍王廟西久廢現借居民宅

廩在署西

監獄在儀門西南

迎賓館在儀門東

明萬歷二年知縣喬巖建久廢

旌善亭在鼓樓東

久廢

申明亭在鼓樓西久廢

陰陽醫學在申明亭東明成化十五年建久廢

僧會司在縣西南隅興福寺明成化十七年建

察院在東大街明成化十五年建久廢
今東陽書院卽其地

太僕分司在察院東久廢

府館在太僕分司東久廢

巡檢司在縣東南七十里董家廟明成化間建
嘉靖中革

蘆花鎮守禦所在縣東四十里鎮爲西北咽喉元置
千戶侯守禦久革

演武場在西郭門外舊志有門有庭
有旗堂久廢

草場在儒學南明知縣喬巖建買
民地四畝久廢

皇華館在北郭玉皇廟東南

有屋三楹以備接
迎送官長之用永免差徭穀

石有
碑記

按官署多以傳舍視之任其廢而不修不則務爲華屋
致累里社二者均譏焉修葺堅整勿廢勿華其庶幾乎

壇廟

社稷壇在西郭門外

舊志有宰牲房
有垣有門今廢

按祭法諸侯爲百姓立社曰國社諸侯自爲立社曰侯
社大夫以下成羣立社曰置社陳祥道曰社所以祭五
土之元稷所以祭五穀之神稷非土無以生土非稷無
以見生生之效故祭社必及稷以其同功均利而養人

故也明史洪武元年頒壇制於天下郡邑俱設於本城西北右社左稷十一年定同壇合祭令三獻皆以文職長官武官不與

風雲雷雨山川城隍壇在南郭門外

舊志有宰牲房有垣有門今廢

按周禮大宗伯以禋燎祀司中司命觐師雨師以狸沈祭山林川澤文獻通考秦漢以來皆祀風師雨師唐天寶五年始增祀雷師皆各立壇以祭明洪武二年始增祀雲師詔風雲雷雨合爲一壇六年以風雲雷雨山川共爲一壇八年又以城隍祭於壇

先農壇在東郭門外壇之北有先農祠

按文獻通考漢舊儀春始東耕於藉田官祠先農後漢
藉田儀正月始耕以乙日祠先農及耕於乙地是月命
郡國守皆勸人始耕唐垂拱中改藉田壇爲先農壇宋
神宗元豐二年詔於京城東南度田千畝爲藉田徙先
農壇於其中明洪武二年建先農壇於南郊在藉田北
祀儀與社稷同祀舉行耕藉禮

邑厲壇在北郭門外

舊志有宰牲房
有垣有門今廢

按厲壇之設子產所謂鬼有所歸乃不爲厲也祭法王
祭泰厲諸侯祭公厲大夫祭族厲士喪禮疾病禱於厲
鄭注謂漢時民間皆祀厲唐開元禮七祀秋祭厲文獻

通考宋秋祭厲牲用羊豕明史洪武三年定制京都祭
泰厲王國祭國厲府州祭郡厲縣祭邑厲皆設壇城北
以清明七月十五十月朔日祭

關帝廟十一

一在北大街

居中南向殿三楹前爲川堂爲大門旁爲角門又前爲石坊旁爲石欄後爲啓聖

宮石坊顏曰萬古英靈明知縣邢侗書字極雄勁聯曰千載勳庸天地竝萬方祠宇古今同邑廩生張凌霄書字作大草有龍跳虎臥之觀明宏治十一年知縣嚴紹祖建萬歷二年知縣喬巖天啓元年知縣張廷箴相繼重修崇禎十六年知縣彭士宏立靈驗碑本朝嘉慶六年直督胡季堂捐俸銀一百兩知縣閻掄閣邑侍御王堯恆等捐修朔望行香春秋二祭在此

一在縣署儀門東

一在縣署譙樓東

一在文昌祠南

一在南街路東市廛內

相傳縣治未遷之先卽有此廟

一在倉衙街

雍正二年邑人王廷璋建

一在油房街

明成化年建門額忠烈及匹馬單刀一聯明知縣邢侗書本朝嘉慶三年重修道

光十年本街紳士募修

一在幞頭街

明嘉靖時邑人劉濂建知縣上官捷科重修本朝雍正五年邑人齊振英姪維寧

增修

一在馬道街

明邑人路望重建

一在南門甕城

南宮縣志
卷二
一在南門外

按三國蜀志

關帝仕漢爲前將軍漢壽亭侯後主景曜三年追諡曰壯
繆侯見華陽國志靈跡自隋始顯宋徽宗崇寧元年封
忠惠公又封崇寧真君大觀三年封武安王淳熙十四
年封英濟王元文宗本紀天歷元年封爲顯靈義勇武
安英濟王遣使祠其廟明萬歷十八年封協天護國忠
義帝四十二年遣司禮監李恩捧旒袍封三界伏魔大
帝神威遠振天尊關帝君

本朝順治九年

勅封忠義神武大帝雍正三年

勅封帝三代爲公乾隆二十五年改諡神勇三十三年

勅封忠義神武靈祐大帝道光九年奉

勅加威顯二字

文昌祠二

一在學衡衙北

殿三楹有垣有門朔望行香春秋二祭
在此嘉慶十六年建 啓聖宮因祠後

地基狹邑人李大成施宅基地南
北四步八尺東西六步一尺三寸

一在東陽書院

乾隆三十八年知縣衷炳修立東陽書
院建在講堂前嘉慶二十二年知縣吳

承寵重修書院移建
於東南隅春秋有祭

靈壽志司馬遷天官書斗魁戴筐六星爲文昌一日上

將二曰次將三曰貴神四曰司命五曰司中六曰司祿
周禮大宗伯以禋燎祀司中司命月令季冬之月畢祀
天之神祇鄭康成謂司中司命與焉蓋文昌之祠久矣
貌而象之號爲帝君則道家之說也棗強志云孝經援
神契文者精所聚昌者揚天紀輔拂竝居以成天象故
曰文昌宮後世以梓潼帝君爲文昌豈星精所化如天
策之爲傳說者耶

文昌閣在縣署南衙前街

舊志在儒學南乾隆二十三年知縣姚學瑛移建於此道光四

年邑人齊兆豐等捐修

魁星閣在城西北隅

舊志在城東南隅乾隆二十三年知縣姚學瑛移建於此五十九年邑人

齊世松等嘉慶二十四年
邑人陳佐等相繼捐修

按北斗一至四爲魁五至七爲杓魁固非一星之名也
後人以文昌宮在北斗上并魁祀之又易魁爲奎史記
云奎曰封豕爲溝瀆正義云奎天之武庫似於文明無
與然宋乾德五年三月五星聚奎竇儼知爲文明之兆
或以奎章名閣或以瀛奎名書以奎主文明舊矣至貌
而象之則道家之說也

城隍廟在西大街

大堂三楹前爲月臺旁爲兩廊十王殿
又前爲樂樓爲角門又前兩旁爲里社

土地祠爲大門旁爲角門又前爲牌坊爲照壁大堂後
爲二堂又後爲寢宮明成化十九年建正德十年知縣
李需嘉靖二年知縣李宗文十二年知縣張木二十二
年知縣崔官崇禎十三年知縣周嗣科相繼重修本